

李文忠公奏稿

李文忠公奏稿

卷之三十九目錄

安籌球案摺

光緒六年十月初九日

州縣兵差報銷摺

光緒六年十月十五日

庫防仍請免調片

光緒六年十月十五日

劉銘傳力疾赴京片

光緒六年十月二十四日

機器局經費奏報摺

光緒六年十月二十六日

請提東省黃河協款片

光緒六年十一月十二日

派丁汝昌赴英收船片

光緒六年十一月二十六日

續收賑捐數目摺

光緒六年十一月二十六日

妥議鐵路事宜摺

光緒六年十二月初一日

議覆張家驥等止鐵路片

光緒六年十二月初一日

議覆梅啟照條陳摺

光緒六年十二月十一日

議覆陳本植條陳片

光緒六年十二月十一日

裁撤張家口糧臺摺

光緒六年十二月十一日

籌辦察哈爾防餉摺

光緒六年十二月十一日

李文忠公奏稿卷三十九

全集一之三十九

桐城吳汝綸編錄

妥辦琉球摺

光緒六年十月初九日

奏爲日本議結琉球案牽涉改約暫宜緩允遵

旨切實妥籌恭摺仰祈

聖鑒事竊臣承准軍機大臣密寄十月初四日奉

上諭前據總理各國事務衙門奏議結琉球一案又據右庶子陳寶琛奏琉球不宜遽結舊約不宜輕改當經惇親王等酌議宜照總理衙門所奏辦理業經允准旋據左庶子張之洞奏日本商務可允球案宜緩復經惇親王等議以日本與俄深相要結又與福建江浙最近今若更動已成之局未必甘心且恐各國從而構煽卒至仍歸前說或併二島而棄之益爲所輕等語自爲揆時度勢

聯絡邦交起見惟事關中外交涉不可不慎之又慎李鴻章係原
議條約之人日本情事素所深悉該督統籌全局將此事應否
照總理衙門原奏辦理並此外有無善全之策切實指陳迅速具
奏總理衙門摺片各一件單三件陳寶琛張之洞摺各一件均著
鈔給閱看等因欽此仰見

聖主審於馭遠慮衷采納不厭精詳曷勝欽服從前中國與英法
兩國立約皆先兵戎而後玉帛被其迫脅兼受朦蔽所定條款喫
虧過鉅往往有出地球公法之外者厥後美德諸國及荷蘭比利
時諸小國相繼來華立約斯時中國於外務利弊未甚講求率以
利益均霑一條列入約內一國所得諸國安坐而享之一國所求
諸國羣起而助之遂使協以謀我有固結不解之勢同治十年日
本遣使來求立約曾國藩始建議宜將均霑一條刪去及臣與該

使臣伊達宗城往復商訂並載明兩國商民不准入內地販運貨物限制稍嚴嗣後該國屢欲翻悔均經駁斥自是祕魯巴西立約亦稍異於前誠以內治與約章相爲表裏苟動爲外人所牽制則中國永無自強之日近聞各國駐京公使每有事會商日本獨不得與其尙未聯爲一氣者未始不因立約之稍異也至內地通商西人以置買絲茶爲大宗資本較富稍顧體面日本密邇東隅文字語言略同其人貪宕食利無恥一開此例勢必紛至沓來與吾民爭利政更包攬商稅爲作奸犯科之事明代倭寇之興卽由失業商人勾結內地奸民不可不防其漸此議改舊約尙宜酌度之情形也琉球原部三十六島北部九島中部十一島南部雖有十六島而周迴不及三百里北部中有八島早被日本佔去僅存一島去年日本廢滅琉球經中國疊次理論又有美前統領格蘭忒

從中排解始有割島分隸之說臣與總理衙門面商謂中國若分
球地不便收管只可還之球人卽代爲日本計算舍此別無結局
之法此時尙未知南島之枯瘠也本年二月間日本人竹添進一
來津謁見稱其政府之意擬以北島中島歸日本南島歸中國又
添出改約一節臣以其將球事與約章混作一案顯係有挾而求
嚴詞斥之不稍假借曾有筆談問答節略兩件鈔寄總理衙門在
案旋聞日本公使矢戶璣屢在總理衙門催結球案明知中俄之
約未定意在乘此機會圖佔便宜臣愚以爲琉球初廢之時中國
以體統攸關不能不亟與理論今則俄事方殷中國之力暫難兼
顧且曰人多所要求允之則大受其損拒之則多樹一敵惟有用
延宕之一法最爲相宜蓋此係彼曲我直之事彼斷不能以中國
暫不詰問而轉來尋釁俟俄事既結再理球案則力專而勢自張

近接總理衙門函述曰日本所議臣因傳聞在津之琉球官向德宏
始知中島物產較多南島貧瘠僻隘不能自立而球王及其世子
曰本又不肯釋還遂卽面商總理衙門謂此事可緩則緩莫免後
悔此議結球案尙宜酌度之情形也臣接奉

寄諭始知已成之局未便更動而陳寶琛張之洞等又各有陳奏
正籌思善全之策適接出使大臣何如璋來書並鈔所寄總理衙
門兩函力陳利益均霑及內地通商之弊語多切實復稱詢訪球
王謂如宮古八重山小島另立三子不止五家不願闢國臣民亦
斷斷不服南島地瘠產微向隸中山政令由其土人自主今欲舉
以界球而球人反不敢受我之辦法亦窮等語臣思中國以存琉
球宗社爲重本非利其土地今得南島以封球而球人不願勢不
能不派員管理既踰義始利終之嫌不免爲日人分謗且以有用

之兵餉守此甌脫不毛之土勞費正自無窮而道里遼遠音問隔絕實覺孤危可慮若憚其勞費而棄之不守適墮日人狡謀且恐西人踞之經營壑闢扼我太平洋咽喉亦非中國之利是即使不議改約而僅分我以南島猶恐進退兩難致貽後悔今彼乃議改前約儻能竟釋球王畀以中南兩島復爲一國其利害尙足相抵或可勉強允許如其不然則彼享其利而我受其害且並失我內地之利臣竊有所不取也謹繹總理衙門及王大臣之意原慮曰本與俄要結不得不揆時度勢聯絡邦交洵屬老成持重之見然日本助俄之說多出於香港日報及東人恫喝之語議者不察遂欲聯日以拒俄或欲暫許以商務皆於事理未甚切當查陳寶琛摺內所指日本兵單餉糾債項纍纍華人爭權自顧不暇倭人畏俄如虎性又貪狡中國卽結以甘言厚賂一旦中俄有釁彼必背

盟而趨利均在意計之中何如瑋節次來函亦屢稱日本外強中乾內變將作讓之不能助我不讓亦不能雖我洵係確論蓋日本近日之勢僅能以長崎借俄屯駐兵船賄給煤米彼益貪俄之利畏俄之強似非中國力所能禁也豈惟日本一國卽英德諸邦及日斯巴尼亞葡萄牙各國皆將伺俄人有事調派兵船名爲保護商人實未嘗不思藉機漁利是俄事之能了與否實關全局俄事了則日本與各國皆戢其戎心俄事未了則日本與各國將萌其詭計與其多讓於倭而倭不能助我以拒俄則我旣失之於倭而又將失之於俄何如稍讓於俄而我因得借俄以懾倭夫俄與日本強弱之勢相去百倍若論理之曲直則日本之侮我爲尤甚矣而議者之謀若有相反者此臣之所未喻也至若江蘇之上海浙江之甯波福建之福州廈門均係各國通商口岸日本卽欲來擾

既無此兵力，倘力亦必不敢開罪於西人。惟臺灣孤懸海外，地險產饒，久爲外人所窺伺。苟經理得宜，亦足控敵東南。應請

廟設加意區畫，漸收成效。中國自強之圖，無論俄事能否速了，均不容一日稍懈。誠以洋務愈多而難辦，外侮愈至而不窮，不可不因時振作。臣前奏明南北洋須合購鐵甲船四號，其數斷難再減。所有請撥准商捐項一百萬兩，僅准戶部議撥四十萬，不敷尙多。應請

旨飭令全數撥濟，各省關額撥海防經費，前經奏明嚴定處分章程，仍未如額籌解。儻再延玩，尙擬請

旨嚴催水師電報各學堂，亦已陸續興辦數年之後，船械齊集，水師練成，聲威既壯，縱不必跨海遠征，而未始無其具。日本擴張之氣，當爲之稍平。卽各國輕侮之端，或亦可漸弭。又總理衙門慮及

日本於內地運貨蓄意已久轉瞬修約屆期彼必力請均霑之益或祇論修約不提球案恐並此南嶺而失之愚以爲南嶺得失無關利害兩國修約須彼此互商斷無一國能獨行其志者日本必欲得均霑之益儻彼亦有大益於中國者以相抵未嘗不可允行若有施無報壹意貪求此又當內外合力堅持勿允者也臣再三籌度除管理商民更改稅則兩條尙未訂定應俟後日酌議外其球案條約及加約曾聲明由

御筆批准於三箇月限內互換竊謂限滿之時在不在之權仍在朝廷此時似宜用支展之法專聽俄事消息以分緩急俟三月限滿儻俄議未成而和局可以豫定彼來催問換約或與商展限或再交廷議若俄事於三箇月內卽已議結擬請

旨明指其不能批准之由宣示該使卽如

微臣

之執奏言路之諫

諍與彼之不能釋放球王有乖中國本意皆可正言告之者臣料
倭人未必遽敢決裂卽欲決裂亦尙無大患

明詔旣責臣以統籌全局切實指陳臣不敢因

朝廷議在在先出爲迴護亦不敢務爲過高之論致礙施行若照
以上辦法總理衙門似尙無甚爲難之處所有日本議結球案牽
涉改約暫宜緩允遵

旨妥籌緣由恭摺由驛五百里密陳是否有當伏乞

皇太后

皇上聖鑒訓示謹

奏

州縣兵差報銷摺

光緒六年十月十五日

奏爲查明直隸各州縣自同治九年起至光緒四年底止供應兵差各款循照例案核實報銷恭摺仰祈

聖鑒事竊直隸各州縣供應兵差前已截至同治八年十二月底止造冊奏銷並將軍需報銷總局裁撤統令藩司經理以歸節省其時直境雖已肅清而陝甘新疆各路軍務倥傯庫倫烏里雅蘇臺科布多一帶籌防緊要時有調撤官兵轉運軍火餉械采買戰馬駝隻等項過境皆飭各州縣俱支上於上年八月奏明度續造冊報銷並以其中有應酌量變通者如帶兵官弁廩給跟役馬匹等項本須按品級核計但各屬冊報往往參差歧異若必逐一查考不特輾轉往還有稽時日且各營或已遣撤或已改調更難查考應將原營送到銜名各起照舊辦理外其未送到者卽按上下

站冊報比對有銜名參差則以最小之品級爲準多寡不符則以最少之數爲準毋庸各取各原營銜名又遣撤東三省察哈爾熱河密雲等處官兵如未經奏明咨回原處者舊章不支車輛廩給惟該官兵到境總以餉口無資紛紛索取並有傷病之人情甚可憫勢難概不應付且東三省官兵多有赴兵部請給護牌者尤不能不照牌應付自應無論遣撤時曾否奏明凡有兵部護牌者均准報銷又兵差車價歷屆奏定章程每車每百里准銷實銀一兩守候一日實銀四錢外銷津貼銀票各半銀一兩惟鈔票業經停止應按停票章程一律改給六成實銀仍照舊於停攤捐廉籌補改攤軍需項下彌補又運送軍火照例以六百斤給車一輛餉銀六千兩給車一輛近年災歉頻仍車畜短少覓雇不易應照兵差車價章程每車百里准銷實銀一兩守候一日實銀四錢併外銷

津貼實銀六錢又兵差銷案自奉行鈔票以後除車價外其官員
廩給兵丁跟役口糧馬駝乾銀船腳米折各屬添設腰撥夫馬工
料等項向按銀票各半造銷者應照停票章程概給六成實銀均
經奏咨立案飭據藩司任道鎔檢齊各屬送到銷冊查照例章分
別駁減詳細勾稽計自同治九年正月一起截至光緒四年十二月
底止直屬各州縣供應征調遣撤各路官兵暨運送軍火餉械等
項共例銷車價實銀十六萬八千四百九十四兩六分一釐三毫
津貼車價實銀六萬五千八百兩二錢六分五毫四絲馬駝乾折
棚廠腳實銀二萬二百二十七兩八錢船腳米折實銀五兩六
錢八分八絲廩給口糧實銀八千二百五十六兩四錢四分七釐
官兵房租價實銀二萬七百兩七錢三分五釐添設腰撥工料棚
廠價值等項實銀六萬二十六兩三錢六分二釐一毫四絲二忽

四微統其應銷實銀三十四萬三千五百十一兩三錢四分六釐六絲二忽四微內房價一項均係隨時向民間租賃例定價銀殊屬不敷現仍按例價造報應照歷次准銷成案核給實銀庶免賠累至應銷銀兩有已經撥款給發者有各屬先行籌墊者統俟接准部復由司分別核扣撥發清款其津貼車價仍照案分年接續攤補等情具詳前來臣覆加查核無異除清冊分送戶兵工部查照外所有查明直屬供應兵差各款核實造冊報銷緣由理合恭摺具陳伏乞

皇太后

皇上聖鑒敕部核銷施行至此次報銷係按各州縣已報者核造此外尚有未經造報及所報供應兵馬各差或無營分可稽或無斤重可核行查尚未接到應俟查覆彙入光緒五年以後兵差案

奏
內列銷合併陳明謹

庫防仍請免調片

光緒六年十月十五日

臣欽奉十月初五日

寄諭奕榕等奏請飭調軍防守一摺據稱前經咨商李鴻章調撥宣化練軍二百五十名赴庫以資鎮攝嗣准李鴻章咨覆難以抽調現在防務緊要請飭或仍酌調宣化練軍或挑選各鎮原營步隊一二千名赴庫等語宣化練軍暨直省步隊能否調撥著李鴻章酌度具奏等因欽此遵查宣化邊防千餘里北口內外要隘甚多現僅練軍馬隊千人實屬自顧不遑無從抽調業於七月十四日詳細覆奏奉

旨允准此外各鎮步隊本屬有限因值海防緊要已陸續調赴津沽新城北塘一帶五千餘人存營之數益少向例冬令必須派隊分防內地東西南北各大道巡緝盜賊護送行旅直境幅輳遼闊

各州縣紛紛稟請尙無以應委難調撥他往庫倫既有原調宣軍
馬隊二百五十人就地選練蒙兵四千人聲威稍壯自不宜再調
直軍轉致綏防空虛除咨庫倫辦事大臣知照外理合附片覆陳
伏乞

聖鑒謹

奏

劉銘傳力疾赴京片

光緒六年十月二十四日

再疊奉

諭旨飭催劉銘傳迅速來京以備任使當即欽遵轉行去後茲劉銘傳於十月二十日由輪船抵津接晤之餘據稱左目尙形昏障須就洋醫調治臣因

國家需才孔急之際

清問屢及需用方殷該提督於中外局勢瞭然於胸忠勇謀略冠越諸將治軍簡器務求精實退歸十載養精韜晦意氣頓平而談及時艱驍果剛勁之色猶時時見於眉宇實爲干城腹心之選力勸其仰副

恩命迅速北上該提督感激奮發遂擬於二十六日力疾起程赴京理合附片覆陳伏乞

聖諭
奏

機器局經費奏報

光緒六年十一月二十六日

奏為天津機器局光緒四五年分動用經費各款循案開單奏報
恭摺仰祈

聖鑒事竊查天津機器局經費奏明動撥津海東海兩關四成洋
稅作正開銷截至光緒三年分止業經督飭局員將支銷款目查
照歷屆成案開列簡明清單具奏並經總理各國事務衙門奏准
津滬兩局每年成造鎗礮及各項經費除照章開單報部外仍令
每年詳細知照該衙門一次以資考證等因咨行遵照在案臣查
津局承造軍火供給北洋海防諸軍兼備各省咨取均屬要需而
近年四成洋稅支用不敷固當以動撥之款核製成之數俾無虛
糜尤當於求精求速之中博節變通有應隨事踵增以資周備者
有應相時緩急以劑盈虛者全賴局員等悉心籌畫斟酌得宜光

二十餘間自造各新式機器逐事推廣其各項軍火照常製造外
各營漸多後門鎗議令減造銅帽爲多製後膛子彈之用所造林
明敦鎗發營領操並稱精利合法以核費與購價懸殊當飭停止
俾可兼顧他工分設電機水雷學堂其生徒已派赴海口各司電
報水雷等事局內仿造電機及沈雷桿雷均足備用茲據承辦局
員津海關道鄧藻如天津道吳毓蘭候補道許其光等詳稱光緒
四年分製成各項火藥五十六萬五千三十五磅六兩銅帽三千
八百九十九萬顆林明敦後門兵鎗三百二十枝格林後門子彈
一百三十七萬六千顆前膛開花礮彈大小六萬三千四十二箇
後膛鎗鉛來福礮彈五千四百四十四箇各式銅紙拉火十四萬
八千一百二十枝大小水雷四十六箇鍋爐及車牀等器七十七

具五年分製成各項火藥六十五萬一千八十三磅銅帽二千八百三十五萬顆林明敦呿士得格林等後門子二百四十五萬二百顆前膛開花礮彈大小六萬六千五百七十四箇後膛鍍鉛來福礮彈九千六百六十一箇各式銅紙拉火二十一萬三千五百十五枝一千磅至四十磅水雷一百四十九箇各式機器四十具又兩年以來製鍊鋤水碾捲銅皮約成五十五萬餘磅添修各廠各營及輪船蚊船銅鐵器具約五萬六千餘件動用經費上屆報銷案內原存銀二萬三千九十七兩六錢二分六釐六毫九忽存料約值銀十五萬九千兩光緒四五年分其領海關四成洋稅銀三十三萬八千九百十兩二錢三分二釐又收北洋海防經費協款項下沙平折實庫平銀十二萬二千六百三十二兩九錢八分六釐七毫計實其支用銀四十八萬二千五百三十九兩五錢一

分二釐三毫七絲五忽仍存銀二千一百一兩三錢三分二釐九毫三絲四忽存料約值銀十六萬一千兩以上兩年用項委因成造口夥兼支應電機水雷局挖河機器船行營製造局等處動款較繁製成軍火有徑發各營月操之件有彙解海防軍械所儲放之件其存留該局廠庫者逐項清釐款目符合均係節慎支用涓滴歸公並無絲毫冒濫惟製造向宗西法料件購自洋商均無例價可循懇仍援照舊章開單請奏前來臣查光緒四五年分係現任天津道吳毓蘭駐局督辦該道補授實缺復委候補道許其光會辦均能與津海關道鄭藻如妥慎籌商力圖兼顧一以恪守成規一以殫求新製西洋機器之用日出不窮或同一子彈而機關迥異同一火藥而塊粒攸分海防各營各船既有此械卽當接濟其應操之需近又訂購快鎗鐵甲等船將來藥彈器物並應責

成該局承辦事宜繁賾據詳各節臣核其兩年用項毫無浮冒與上屆比較相符成件頗有增益當此有事之秋供億尙能取給存儲不致無餘具徵該道等督率有方功歸實濟應援照向章繕具簡明清單恭呈御覽合無仰懇

天恩敕部查照成案准銷除分咨戶工二部查照並遵造每年成件及撥用存留數目簡明清冊咨送總理各國事務衙門備查外所有天津機器局光緒四五年分動用經費據實開單緣由理合恭摺具陳伏乞

皇太后

皇上聖鑒訓示謹

奏

請提東省黃河協款片
光緒十年十一月十二日

再直境黃河僅止一隅且地勢北高南下其利害全在東省是以
升任山東撫臣丁寶楨前於堵築買莊之役發給直民津貼勸築
東明南隄以資保衛直隸著名貯蓄庫藏奇絀民力拮据前調各
軍加築隄身及頻年抽派練兵防汛雖用款格外撙節所費已屬
不貲此次漫口大工應用椿木枕檣葦繩藤斤極巨附近存料早
因大汛搶險搜括一空須遠赴二三百里以外設法增價采購且
水陸運送不能盡資民力費又加倍隄外一片泥水取土更難練
兵本屬無多正值海防及內地冬防不得不添雇民夫寬給工價
其打椿鑲埽進占等項尤應多募河工熟手相助爲理現漫口雖
迫期合龍計連本年防汛歲費銀二千餘兩已湊撥過保定練餉
局兵餉銀二萬兩大名道庫釐金及扣存綠營兵餉零星雜款銀

五萬餘兩共合七萬餘兩實在力盡筋疲無可搜索而官紳承辦料物暫時設法借欠亟待歸還之款尙復不少又應補築大隄及一切善後工程總其約需銀十數萬兩除已由直省竭力盡籌七萬餘兩約不敷銀八萬兩山東撫臣周恆祺來函以事關東省利害直力艱窘慨然願助工款具徵公忠體

國力任其難東省庫儲情形雖非昔比但此次大工緊要旣已不分畛域必可迅速協籌應請

旨飭下撫臣周恆祺督飭藩運司糧道無論何款移緩就急剋日湊提銀八萬兩星夜委員徑解東明工次交大順廣道劉盛藻兌收及時濟用以全大局而免貽誤臣已飭劉盛藻吳廷斌等處處核實撙節嚴行督查不准工員絲毫浮冒此工係倉卒搶辦並非預先勘估但求涓滴歸公亦不能牽引例價應照歷次成案事竣

將用款數開單奏報免造細冊報銷其東省協款直庫撥款均
即就案開除以免糜費理合附片陳請伏乞
聖鑒訓示謹
奏

派丁汝昌赴英收船片

光緒六年十一月二十六日

再臣於去冬飭總稅務司赫德由英國阿摩士莊商廠訂造碰快船兩號約明年春夏工成來華業經奏明在案查前購各蚊礮船係赫德金登幹由英國雇覓水師弁兵包送來華不特需費較多且沿途風濤沙綫情形駕駛要訣以及洋面如何操練機器如何使用中國弁兵均未曾親歷周知殊非造就將材之道今新購碰快船兩號據赫德次呈稱船堅礮巨實為西洋新式利器臣已取名一曰超勇一曰揚威亟宜自派妥員前往英廠考察驗收並選帶弁兵水手續往管駕添募洋弁數名一同講求所到各處洋面隨事習練庶回鑾後駕輕就熟可期得力臣已派督操北洋礮船記名提督丁汝昌總教習洋員葛雷森總理兩船事宜督同管駕官林泰曾章帥收鄧世昌及弁兵舵水人等二百餘員名於十

一月初航海赴滬丁汝昌葛雷森先於月內搭船赴英料理一切其餘員弁水手等先在吳淞官輪船操練俟丁汝昌等察看船成預寄電信到滬卽令自行駕駛招商局輪船出洋馳往英倫升換中國龍旗管帶來華一面咨會總理衙門既出使大臣曾紀澤李鳳苞互相照料並屬赫德轉飭倫敦稅務司金登幹隨時與丁汝昌等會商籌備一切至出洋員弁兵丁應需加支薪糧盤費號衣等項飭局於海防經費項下從優籌發其船隻自英回華沿途燒煤食用各件由赫德金登幹照案妥備俾免缺乏將來該員弁等接帶碰快船到後如果沿途辦理妥協操練熟悉再由臣察核援照出使各國人員優保之例據實奏請獎勵以昭激勸所有派撥官弁赴英驗收管帶新購碰快船同華緣由理合附片具陳伏乞

奏聖鑒訓示謹

續收賑捐數目摺

光緒六年十一月二十六日

奏爲查報直省續收賑捐應獎數目恭摺仰祈

聖鑒事竊臣前因直境連遭災歉賑撫所需多賴外省集捐濟助

請將捐款按照部定新章給獎銜封兩項以資維繫欽奉

諭旨允准在案查自上年秋冬以來疊經東南各省官紳竭誠諭

勸而商富士民亦皆好義急公陸續捐湊賑撫得以舉辦民命實

多全活茲據籌賑局司道詳稱截至本年九月以前止共收過外

省本省捐款銀六十四萬五千八百五十九兩四釐五毫六絲九

忽津錢四萬四千零四串四十六文合銀一萬四千六百六十八

兩一分五釐大米三千二百三十六石合銀八千九十兩高粱五

千六百五十二石六斗二升五合六抄合銀八千四百七十八兩

九錢三分七釐五毫九絲棉衣十六萬九百五十七件合銀十六

萬九百五十七兩統其銀錢米衣合銀八十三萬八千五十二兩九錢五分七釐一毫五絲九忽去冬奏報之捐銀九萬八千兩棉衣一萬餘件卽在其內均經隨時分撥順直災區核實散放或以工代撫所有動支數目月行循案開單彙報並卽飭取捐生履歷照章分批咨部核獎其照例聲請建坊者如數開除現准部咨賑捐應於何時停止查本年直境東北窪區積水未消五月間大雨連縣又增新漲六七月天氣久晴西南各屬高地被旱東明黃河又於霜降後漫隄成口現雖將秋冬賑務將就敷衍漫口亦經堵合而來春青黃不接災黎待哺嗷嗷並應辦大清河滹沱河各項要工以工代撫統計所需甚巨直庫奇絀無從騰挪部帑拮据未敢指請不得不勸捐集腋冀救民命一時實難停止至各省捐賑紳民必須有以鼓舞現僅銜封兩項以虛獎得實銀無礙政體迥

與從前實官優獎不同本已不能踴躍若併此不給則絲毫無從
激勸繼驅賑務緊要勢須另請庫帑更多窒礙自應循照奏定章
程接續勸辦俟災困漸舒再議停止合併恭摺具陳伏乞

皇太后

皇上聖鑒敕部查照謹

奏

奏議鐵路事宜摺

光緒六年十二月初一日

奏爲鐵路爲富強要圖亟宜試辦籌款立法尤宜得人豫爲考究

遵旨妥議恭摺仰祈

聖鑒事竊臣承准軍機大臣密寄十一月初二日奉

上諭劉銘傳奏籌造鐵路一摺所請籌款試辦鐵路先由清江至
京一帶興辦與本年李鴻章請設之電綫相爲表裏等語所奏係
爲自強起見著李鴻章劉坤一按照摺內所陳悉心籌商妥議具
奏原摺著鈔給閱看等因欽此仰見

聖主虛心時艱力圖振作周諮博訪不厭精詳曷勝欽服伏思中
國生民之初九州萬國自爲風氣雖數百里之內有隔閡不相通
者聖人既作剡木爲舟剡木爲楫舟楫之利以濟不通服牛乘馬

引重致遠以利天下自是四千餘年以來東西南朔同軌同文可謂盛事迄於今日泰西諸國研精器數創造火輪舟車環地球九萬里無阻不通又於古聖所制舟車外別出新意以奪造化之工而便民用邇者中國仿造輪船亦頗漸收其益蓋人心由拙而巧器用由樸而精風尚由分而合此天地自然之大勢非智力所能強遏也查火輪車之制權輿於英之煤礦道光初年始作鐵軌以約車輪其法漸推漸精用以運銷煤鐵獲利甚多遂得擴充工商諸務雄長歐洲既而法美俄德諸大國相繼經營凡佔奪鄰疆開闢荒地無不有鐵路以導其先迨戶口多而貿易盛又必增鐵路以善其後由是歐美兩洲四通八達爲路至數十萬里微調則旦夕可達消息則呼吸相通四五十年間各國所以日臻富強而莫與敵者以其有輪船以通海道復有鐵路以便陸行也卽如日本

以區區小國在其境內營造鐵路自謂師西洋長技輒有藐視中國之心俄自歐洲起造鐵路漸近浩罕恰克圖等處又欲由海參崴開路以達那齊中國與俄接壤萬數千里而使早得鐵路數條則就現有兵力儘敷調遣如無鐵路則雖增兵增餉實屬防不勝防蓋處今日各國皆有鐵路之時而中國獨無轡猶居中古以後而屏棄舟車其動輒後於人也必矣竊嘗攷鐵路之興大利約有九端江淮以北陸路爲多非若南方諸省河渠貫注而百貨流通故每歲所徵洋稅釐金二三十萬兩在南省約十之九在北方僅十之一儼鐵路漸興使之經緯相錯有無得以懋遷則北民必化惰爲勤可致地無遺利人無遺力漸臻殷阜之象其鐵路扼要之處徵收釐稅必漸與南方相埒此便於國計者利一也從來兵合則強兵分則弱中國邊防海防各萬餘里若處處設備非特無此

餉力亦且無此辦法苟有鐵路以利師行則雖滇黔甘隴之遠不過十日可達十八省防守之暇皆可爲遊擊之師將來裁兵節餉併成勁旅一呼可集聲勢聯絡一兵能抵十兵之用此便於軍政者利二也京師爲天下根本獨居中國之北與腹地相隔遼遠控制綦難緩急莫助咸豐庚申之變議者多請遷都率以事體重大未便遽行而外人一有要挾卽欲撼我都城若鐵路既開萬里之遙如在戶庭百萬之眾剋期徵調四方得拱衛之勢

國家有磐石之安則有警時易於救援矣各省仕商絡繹奔赴遠方糧貨轉輸迅速皆願出於其途藏於其市則無事時易於富庶矣不必再議遷都而外人之覬覦永絕自有萬年不拔之基此便於京師者利三也曩歲晉豫存饑山西米價騰踴每石需銀至四十餘兩設有鐵路可運核以天津米價與火車運價每石不過七

兩左右以此例之各省遇有水旱偏災移粟輦金捷於影響可以多保民命且貨物流轉自免居奇之弊此便於民生者利四也自江浙漕糧改行海運議者常欲規復河運以防海運之不測鐵路若成譬如人之一身血脈貫通即一旦海疆有事百萬漕糧無虞梗阻其餘如軍米軍火京餉協餉莫不應手立至此便於轉運者利五也輪車之行較驛馬十倍之速從此文書加捷而頒發條教查察事件疾於置郵他如偵敵信捕盜賊皆朝發夕至並可稍裁正路驛站以其費擴充鐵路此便於郵政者利六也煤鐵諸礦去水遠者以火車運送斯成本輕而銷路暢銷路暢而礦務益興從此煤鐵大開修造鐵路之費可省而軍需利源更取不盡而用不竭此便於礦務者利七也凡遠水之區洋貨不易入而土貨不易出今輪船所不達之處可以火車達之出入之貨愈多則輪船運

貨亦與火車相爲表裏此便於招商輪船者利八也無論官民兵商往來行役千里而瞬息可到兼程而進費轉輕無寇盜之虞無風波之險此便於行旅者利九也以上各端西洋諸國所以勃焉興起者罔不慎操此術而國計軍謀兩事尤屬富強切要之圖劉銘傳見外患日迫兼憤彼族欺陵亟思振興全局先播風聲俾俄日兩國潛消窺伺之心誠如

聖諭係爲自強起見查中國要道南路宜修二條一由清江經山東一由漢口經河南俱達京師北路二條宜由京師東通奉天西通甘肅誠得此四路以爲根本則傍路繁要之區雖相去或數百里而地段較短需費較省即招商集股亦與情所樂就從此由幹達枝縱橫交錯不患鐵路之不振興惟統計四路工費浩繁斷難並舉劉銘傳擬先造清江至京一路與臣本年擬設之電綫相輔

並行庶看守易而遞信彌捷洵兩得之道蓋先辦一路雖於中國形勢尙偏而不舉然西洋諸國五十年前亦與中國情形相等惟其刻意營繕爭先恐後故有今日之氣象劉銘傳之意蓋欲先創規模以爲發軔之端庶將來逐漸推廣不患無奮興之日也顧或謂鐵路若開恐轉使敵人來犯之途且洋人久思在中國興造鐵路此端一起或致彼愈滋煩瀆不知各國之有鐵路皆所以徵兵禦敵而求問爲敵用何也鐵路在我內地其臨邊處皆有兵扼守彼豈能憑空而至萬一有非常之警則壞其一段扣留火車而路亦無用而全路皆廢數十年來各國無以此爲虞者客主順逆之勢然也至洋人擅在他國造路本爲公法條約所不准若慮其逞強爽約則我卽不自造鐵路彼獨不能逞強乎況洋人常以代中國興利爲詞今我先自興其利且將要路占造庶足關其口而奪

之氣使之廢然而返矣或又謂鐵路一開則中國之車夫販豎將無以謀衣食恐小民失其生計必滋事端不知英國初造鐵路時亦有慮奪民生計者未幾而傍路之要鎮以馬車營生者且倍於曩日蓋鐵路祇臨大道而州縣鄉鎮之稍僻者其送客運貨仍賴馬車民夫鐵路之市易既繁夫車亦因之增眾至若火車盛行則有駕駛之人有修路之工有巡歷之丁有上下貨物伺候旅客之雜役月賦工糈皆足以仰事俯畜其稍饒於財者則可以增設旅店廣買股分坐權子母故有鐵路二千里而民之依以謀生者當不下數十萬人況煤鐵等礦由此大開貧民之自食其力者更不可數計此皆擴民生計之明證也或又謂於民間田廬墳墓有礙必多阻撓不知官道寬廣鐵路所經不過丈餘之地於田廬墳墓尙不相妨即遇官道稍窄之處亦必買地優給價值其墳墓當

道者不難稍紆折以避之劉銘傳勦捻數年於中原地勢民情固親歷稔知者也惟是事端宏大經始之初宜審之又審俾日後勿滋流弊始足資程式而行久遠臣嘗博采眾議外洋造路有堅窳久暫之不同其價亦相去懸殊每里需銀自數千兩至數萬兩不等清江浦至京最爲衝要之衢造路須堅實耐久所需經費雖未能豫定爲數自必不貲現值帑項支絀之時此宗巨費欲籌之官則挪湊無從欲籌之商則散澳難集劉銘傳所擬暫借洋債亦係不得已之辦法從前中國曾借洋債數次議者恐各省紛紛援例致受洋人盤剝之累經戶部奏明停止願借債以興大利與借債以濟軍餉不同蓋鐵路既開則本息有所取償而國家所獲之利又在久遠也惟是借債之法有不可不慎者三端恐洋人之把持而鐵路不能自主也宜與明立禁約不得干預吾

事但使息銀有著期限無誤一切招工購料與經理鐵路事宜由
我自主借債之人毋得過問不如是則勿借也又恐洋人之詭謀
而鐵路爲所佔據也宜仿招商局之例不准洋人附股設立鐵路
公司以後可由華商承辦而其政令須官爲料理所借之債議定
章程由該公司分年抽繳期於本利不至虧短萬一偶有虧短由
官著追只准以鐵路爲質信不得將鐵路抵交洋人界限既明弊
端自絕不如是則勿借也又恐因鐵路之債或妨中國財用也往
時所借洋款皆指定關稅歸償近則各關撥款愈繁需用方急宜
議明借款與各海關無涉但由
國家指定日後所收鐵路之利陸續分還可遲至一二十年繳清
庶於各項財用無所牽掣不如是則勿借也凡此數端關係較鉅
聞洋人於債項出納之間向最慎重若盡照所擬辦法或恐未必

肯借彼若肯借方可興辦與其速辦而滋弊端不如徐議而免後悔又聞各國鐵路無一非借債以成但恃素有名望之監工踏勘估工之清單與日後運載之利益足以取信於人中國南北鐵路行之日久必可多獲盈餘誠設立公司名曰延一精練監工細爲勘估由總理衙門暨臣等核明妥立憑單西洋富商或有願爲稱貸者至鐵路應試造若干里如何選料募匠如何費省工堅非悉心考究無由握其要領一切度地用人招商借債事務繁賾非有特派督辦之大員呼應斷不能靈查劉銘傳年力尙強英氣邁往曾磨艱鉅近見各國環侮亟思轉弱爲強頗以此事自任惟造端不易收效較遲儻值外患方殷朝廷或畀以軍旅之寄自應稍從緩議現既乞假養病別無所事若蒙

聖主授以督辦鐵路公司之任先令將此中款要專精考校從容商推卽俄曰各國驟聞中國於多事之秋尙有餘力及此所以示之不測未始非先聲後實之妙用且以其暇招設公司商借洋債雖能否借到巨款尙無把握然以劉銘傳之勦望中外合力維持措注較易於他人其舊部駐防直蘇兩省不下萬餘人將來講求愈精或另得造路省便之法或以勇丁幫同修築或招華商巨股可以設法騰挪當與隨時酌度妥辦蓋劉銘傳以原議之人始終經理卽待其效於十年以後尤屬實無旁貸備更有要任相需仍可聞

命卽行獨當一面也再中國既造鐵路必須自開煤鐵庶免厚費漏於外洋山西澤潞一帶煤鐵礦產甚富苦無殷商以巨本經理若鐵路既有開辦之資可於此中騰出十分之一仿用機器洋法

開采煤鐵卽以所得專供鐵路之用是礦務因鐵路而益旺鐵路因礦務而益修二者又相濟爲功矣所有籌辦鐵路力圖自強宜豫爲考究設法試行各緣由恭摺由驛覆陳是否有當伏乞

皇太后

皇上聖鑒訓示謹

奏

議覆張家驥等止鐵路片

光緒六年十二月初一日

再臣接准軍機大臣密寄十一月二十一日奉

上諭前據劉銘傳奏請籌造鐵路當經諭令李鴻章等妥議茲據張家驥奏稱開造鐵路約有三弊未可輕議施行等語著李鴻章悉心妥籌具奏原摺著鈔給閱看等因欽此竊思凡建一事必兼權乎利害重輕而後無疑畏拘牽之慮凡議一事必確得之閱歷攷校而後無揣摩影嚮之談臣於鐵路之利益大端與籌款之難防弊之法既詳陳之矣至張家驥所稱清江浦爲水陸通衢若造成鐵路商旅輻湊恐洋人從旁覬覦借端要求等語臣謂洋人之要挾與否視我國勢之強弱我苟能自強而使民物殷阜洋人愈不敢肆其要求我不能自強則雖民物蕭條洋人亦必隱圖其狡逞卽如越南國政不善經理以致民生凋敝日就貧弱法人乘閒

侵奪其六省以洋法經營曰臻富庶是其明鑒蓋強與富相因而民之貧富又與商埠之旺廢相因若慮遠人之覬覦而先遏斯民繁富之機無論遠人未必就範即使竟絕覬覦揆之謀國庇民之道古今無此辦法也張家驥又謂開造鐵路恐於田廬墳墓橋梁有礙民間車馬及往來行人恐至擁擠磕碰徒滋騷擾查外洋鐵路有雙單行之別雙行者佔地寬不過一丈二尺單行者佔地七尺今南北官道寬至二三丈及四五丈不等鐵路所佔不及官道之半既須填築加高與官道判若兩塗自於官道中車馬行人無所妨礙其十字午貫之路則有建旱橋之法有於兩旁設立柵門瞭望火車將至則閉柵以止行人俟火車既過然後啟柵之法至造路之費地價亦其大宗如有田廬侵礙官道者當不惜重價以償貧民輿情自可樂從萬一有民間墳墓及田廬不願遷徙者自

無難設法繞避其他跨山越水建造橋梁外洋自何成法可循未
聞其不便於民也張家驥又謂水陸轉運及往來之人祇有此數
若以鐵路奪輪船之利恐招商局數百萬款項一旦無著查近水
之區運貨利用輪船其行稍遲而價較廉遠水之地運貨利用火
車其行更速而價較鉅二者固並行不悖卽或鐵路初成之時招
商局生意略減然該局既將旗昌原價繳清復分年拔還官帑成
本日輕每歲得消項津貼縱令運載稍分於鐵路亦尙可支持周
轉數年之後商貨日多更可與鐵路收相濟之益且北方地非磽
瘠而繁富之象遠遜南方益由運路艱阻而其民於所以殖貨之
原亦遂不肯勤求若一旦視運銷之便則自耕織以外必更於藝
植之利工作之利一一講求可無曠土游民之患卽如江浙閩鄂
等省自通商以後絲茶之出其地者倍於曩日則謂水陸轉運祇

有此數者似又未盡然也以上張家驥所陳三弊臣逐細研求尙覺不甚確鑿大抵近來交涉各務實係中國創見之端士大夫見外侮日迫頗有發憤自強之議然欲自強必先理財而議者輒指爲言利欲自強必圖振作而議者輒斥爲喜事至稍涉洋務則更有鄙夷不屑之見橫互胸中不知外患如此其多時艱如此其棘斷非空談所能有濟我

朝處數千年未有之奇局自應建數千年未有之奇業若事事必拘守成法恐日卽於危弱而終無以自強語曰非常之原黎民懼焉及臻厥成天下晏如也臣於鐵路一事深知其利國利民可大可久假令

朝廷決計創辦天下之人見聞習熟自不至更有疑慮然臣不敢謂其事之必成者以集款之非易而籌借洋債亦難就緒也果使

巨款可集而防弊之法又恐能如臣所擬則此等大事固當力排
浮議破除積習而爲之若洋債未能多借商股未能驟集則雖欲
舉辦一時亦尙無其力臣因張家駉所慮而遵

旨妥籌略抒管見如此謹附片具陳是否有當伏乞

聖鑒訓示謹

奏

議覆梅啟照條摺

光緒六年十二月十一日

奏爲海防要圖分別緩急遵

旨妥籌恭摺密陳仰祈

聖鑒事竊臣承准軍機大臣密寄十一月初二日奉

上諭梅啟照奏請整頓水師擬定各條開單呈覽一摺所稱請飭
船政局及江南機器局仿造鐵甲船豫籌購買外洋鐵甲船及鎗
礮等件推廣招商局船赴東西洋各國貿易添設海運總督設立
外海水師提督裁改海疆各種笨船嚴防東洋練習水戰長江水
師添撥中號輪船各節係爲自強起見著李鴻章劉坤一按照摺
內所陳悉心籌商妥議具奏原摺單著鈔給閱看等因欽此仰見
聖主整飭海防虛衷博訪至意曷勝欽服從來禦外之道必能戰
而後能守能守而後能和無論用剛用柔要當豫修武備確有可

以自立之。然後以戰則勝以守則固。以利則久。自泰西各國競起爭雄。陸兵以德國爲最精。水師以英國爲最盛。至其船堅礮利。則無論國之大小。莫不精益求精。益外洋以戰立國。分爭互峙。實有不能不尙武之勢。萃千萬人之心思才力。以治戰艦。鎗礮。遂月異而歲不同。日本雖最爾彈丸。近亦思學步西人。陵侮中國。夫以中國風氣較遲。地廣民衆。爲各國所環。伺卽使俄與日本暫弭戢端。而濱海萬餘里。必宜練得力水師。爲建威銷萌之策。揆之事勢固難再緩。梅啟照所謂講求船礮。誠思患豫防。綢繆未雨之至計也。查原奏單內第一第二條。請令船政大臣及江南機器局仿造鐵甲船。從前閩滬輪船多係舊式。以之與西洋兵船。舟勝尙難得力。閩廠後來所造揚武超武兩船。則漸漸合用矣。然欲仿造鐵甲船。尙恐機器未全。工匠未備。不若西洋購材料。取攜較便。廠肆

既多可以任意選擇惟是中國製造之法宜漸擴充果使所造行駛之速鋒梭之利不遜於洋廠雖需費稍多亦可免洋人之居奇開華匠之風氣擬請

敕下船政大臣詳查該廠仿造鐵甲究須添備機器若干船長廣及喫水若干丈尺鐵甲厚若干仿照何項新式每點鐘能行若干里約須造價若干詳細酌估具覆如能合算即以應購鐵甲之費附入該廠剋期造辦至滬局製造鎗礮彈藥各項工器太繁經費支絀已飭停造輪船同治十三年試造小鐵甲船不能出海礮位布置亦不合法雖該局機器略備而無精熟此道之員匠於西洋新式隔閘尙多似可緩議也第三條請俟俄事定妥仍速購鐵甲船臣前奏明南洋與臺灣購鐵甲船二號北洋購鐵甲船二號合其四號斷難再少現據李鳳苞電報已在德國船廠訂造鋼面鐵

甲一雙彙集各國新式核開價目船礮兩宗約需規平銀一百四十萬兩而添購魚雷電燈及回國運費尙不在內蓋既購利器須擇其最新之式樣李鳳苞親歷英德各廠再三悉心考校始行定議自必確有所見惟臣初次請撥兩船之款僅得福建六十萬出使經費兩次借撥六十萬部餉三十萬本多短絀今需價稍昂計兩船不敷已一百數十萬兩至續請兩船所指淮南鹽捐及招商局官款即使如數撥濟尙短百萬焦灼莫名臣已函告李鳳苞商令此後定船如能較前價稍減或此間籌足款項方可續訂第已定之一隻除先匯英銀二十萬鎊合銀七十七萬五千餘兩外將來分期續匯只有儘借撥出使經費及部餉三十萬酌量勻湊若續訂一隻所短百萬以外應請

敕下總理衙門戶部迅爲籌撥的款以濟要需至南洋經費短

解日多臣於三月六月間兩次奏催請比照京餉章程豫定延欠處分經戶部議覆奉

旨俞允在案惟尙無分別藩司督撫明文各省報解仍不及八成之數今梅啟照擬請將藩司照貽誤京餉例議處督撫於藩司處分上減一等議處實與前次部議相符且邊防海防無分軒輊陝甘既比例京餉則海防豈可歧視擬請

旨敕下該衙門申明舊例知照各省自此次定章以後儻再有拖欠遲逾均卽照例議處惟原撥經費四百萬兩除去福建廣東截留之款卽使解足八成合南非洋不過得二百萬餘兩每處僅得百餘萬目前添購後膛鎗礮及水雷電綫等項需用繁巨以後船隻到齊歲費實苦不支是欲購大宗船械非隨時籌不可鐵甲船尤非另籌不可也第四條請推廣招商局船赴東西洋各國夫

欲自強必先裕餉欲濬餉源莫如振興商務商船能往外洋俾外
洋損一分之利即中國益一分之利微臣創設招商局之初意本
是如此近來該局和眾美富兩船已往舊金山檀香山等埠明春
擬派海琛船運載兵弁赴英驗收碰快船回華均足爲商船出洋
之先導然此事須逐漸擴充非倉卒所能收效至日本自設輪船
公司關稅獨減中國商輪前往權稅加重故局船因虧耗而裹足
所請酌派豐順保大試行東洋之處應從緩議第五條請添設海
運總督查運河爲黃水梗阻每歲止能運十萬石而百萬石斷不
能運誠如梅啟照所言然往時河運費多弊重以有倉場有酒督
上下各衙門層層鈐制也今海運百萬石招商局與沙船分運毫無
貽誤經費較前流弊尙少若於煙臺添設總督多一衙門即多
一重胥吏丁役需索之繁恐經費漸難撙節弊端仍難淨除如慮

海上有事固非空設一大員所能爲力如令其節制沿海水師則既有南北洋大臣及各省督撫又有添設外海水師提督又設漕督未免號令紛歧事權不一應請無庸置議第六條請將海疆各種笨船一律裁改臣於同治十一年五月十三年十一月兩次奏請將各省紅單拖罟艇船舢板等項分別裁併抵養輪船前福建撫臣丁曰昌亦曾奏稱裁併五十號艇船可養給一號大兵輪船裁併十號舢頭舢板可養給一號根撥輪船臣於去年十一月議覆丁曰昌條陳內奏稱艇船兵舢較儉閒能捕盜於淺水之處以輔輪船所不逮雖未可盡裁請擇其廢敗無用者量加裁撤今梅啟照請將各種笨船除多槳可行逆風者暫留少半餘皆裁改與臣等前議大致相同意在騰出餉項化無用爲有用實爲救時要政擬請

救下沿海各省督撫悉心酌度力任怨謗認真辦理第七條請嚴防東洋查日本國小民貧虛僞喜事長崎距中國口岸不過三四日程揆諸遠交近攻之義日本狡焉思逞更甚於西洋諸國今之所以謀創水師不遺餘力者大半爲制馭日本起見至朝鮮爲東三省屏蔽關係尤鉅臣前勸其與西人立約並導以練兵購器無非望其轉弱爲強他日如該國有警或須派兵應援或別有救急之方固當惟力是視也第八條請設立外海水師提督從前丁日昌有設立北洋中洋南洋水師提督之議與前督臣曾國藩所陳沿海七省沿江三省歸併設防之說大旨略同北洋俟鐵甲二船購到海上可自成一軍擬請添設水師提督額缺其體制應照長江水師提督之例節制北洋沿海各鎮按期巡洋會哨以專責成南洋船隻亦尚未齊或如梅啟照所議暫將統領輪船之松江提

督改爲蘇浙外海水師提督節制蘇浙沿海各鎮擬請

收下南洋大臣察酌情形隨時妥辦惟閩粵臺灣與松滬相去甚
遠勢難兼顧且福建統領輪船之提督彭楚漢與松江提督李朝
斌望均勢敵難相統攝似應與廣東聯爲一氣耳第九條請令海
疆提鎮練習水戰大致卽是設立外海水師之說梅啟照謂水能
兼陸陸不能兼水敵船可以到處窺伺我挫則彼乘勢直前彼敗
則我望洋而歎洵屬確論夫水師所以不能不設者以其化呆著
爲活著也今募陸勇萬人歲餉約需百萬兩然僅能專顧一路耳
若北洋水師成軍核計歲餉亦不過百餘萬兩如用以扼守旅順
煙臺海面較狹之處島嶼深隱之間出沒不測卽不遑與敵船交
仗彼慮我斷其接濟截其歸路未必無徘徊瞻顧之心是此項水
師果能以全力經營將來可漸拓遠島爲藩籬化門戶爲堂奧非

洋三省皆在扞衛之中其布勢之遠奚啻十倍陸軍卽此以觀而南洋之利川水師亦可想見然所以議之數年尙無成者以無大宗經費購辦鐵甲船快船也竊查定制各省綠營兵數六十餘萬歲餉約二千萬兩邇者直隸河南兩江閩浙湖北等省皆加餉練兵其餘歲發兵餉自五六成至七八成不等然自剿辦髮捻回各逆專倚勇營迨內地肅清各省復不能不酌留防勇以資彈壓而綠營則竟無可調用其兵精則姑循守舊章是多一倍餉額也自海上防務興而築礮臺造戰艦購鎗礮練海軍厥費甚鉅原所以代綠營勇營之用而綠營勇營仍未少減是又多一倍餉額也中國財用本不甚裕而有此三倍之餉額所以愈形支絀今海上如有水軍一枝勝於陸勇數萬人陸勇一枝勝於綠營數萬人值此多事之秋勇營分防要地尙難裁減如欲實事求是整軍經武惟

有稍汰綠營積存餉項以爲購造船械創立海軍之經費擬請
敕下各疆臣查明該省綠營兵現存實數除加餉練兵省分及邊
要各鎮或難驟減其餘酌度形勢通減二三成汰減之法凡老病
死亡斥革之卒皆空其額不得挑補沿海營兵可挑入水師者亦
如之每歲疆吏核明所減兵數與所節餉數咨報戶兵二部戶部
卽提出此款撥歸南北洋爲籌辦海軍之用如此數年後或有成
數可稽夫今之議者頗謂勇營亦有流弊不如綠營經制之兵若
汰經制之綠營而立經制之海軍一轉移間可收實用且所減僅
二三成而又出之以漸措辦尙無窒礙裕餉強兵之道舍此似無
他術也第十條請長江水師添撥中號輪船查前侍郎臣彭玉麟
奏請添造十七八丈之中號輪船十隻爲江陰以下海防之用奉
旨敕下兩江福建廣東各省籌辦果使款項應手克期趕造則江

防聲勢較盛惟需費已近百萬現在閩滬粵三廠餉項皆形竭蹶
能否認定分辨尙難懸揣梅啟照擬撥長江提督輪船二隻沿江
五鎮每鎮一隻計共七隻已稍減於彭玉麟所請之數與其無款
而中輟不如少造而有成似宜俟閩粵各廠參酌會商量力分造
必令仿兵船之式而不必預定船數亦防務之一助也以上梅啟
照所陳十條或亟宜興辦或暫可緩行或稍俟變通至梅啟照議
創水師注意於鐵甲船所稱遴選武員有智謀而小心者文員有
膽略而耐勞者爲之統將自係識時之論或謂敵本用此中國卽
有數號鐵甲豈能制勝不知西洋各國去中國數萬里其大鐵甲
來者不過數號其餘均係快船兵船之類中國亦須逐漸添製但
能利器與之相敵加以客主勞逸之勢我自可操勝算至日本地
陬財賦近雖偏強東海之中其力量亦斷不能多購真鐵甲也所

有梅啟照條陳各件謹分別緩急遵
旨妥籌恭摺由驛密陳是否有當伏乞

皇太后

皇上聖鑒訓示謹

奏

議覆陳本植條陳片

光緒六年十二月十一日

再奉十二月初二日

寄諭岐元代奏道員陳本植條陳邊防事宜一摺所稱奉天以朝鮮爲屏蔽該國設被吞併則我之藩籬盡撤爲患益深宜力籌保衛等語尙爲明切惟請將洋稅專供防餉其勢有所難行著李鴻章將該員條陳悉心酌覈擇其可以施行者繕議具奏原摺著鈔給閱看等因欽此臣詳閱該道陳本植所陳各路戰守大局頗中窺要其言奉省屏障實藉朝鮮若被吞併則我之藩籬盡撤欲於東邊中江一帶厚積軍威精壯彼國聲援兼防鴨綠江口設狡焉思逞則我中江練卒可出朝鮮之背據險以邀之吉林勁旅可由海參崴之南伺閒以乘之等語查自本年夏秋俄國調集大幫兵船東來遊駛長崎海參崴一帶形蹤詭祕各國公使提督多謂俄

人將攻奪朝鮮海口以拊我奉天吉林之背迄今冬月凍封俄海
部尙書來沙弗斯基由海參崴帶船折回長崎途次遇風傷足寂
無動靜若必謂其乘機吞併朝鮮雖有此謠實無此事且聞朝鮮
海口形勝皆在東面距奉省尙遠俄卽有意蠶食必先由通商入
手臣前面諭朝鮮使臣卞元圭以俄船若遽闖入該國須派委員
接待相機酌允議約並漸與各國立約以牽制之若果照辦一時
似不至被人吞併陳本植請於東遼中江一帶厚積軍威藉壯聲
援如有巨餉可指亦應先事籌維惟所稱各路集兵須二十餘萬
每年需餉千餘萬未免張皇其詞不獨各關洋稅均有留支撥協
之款無可抽撥此外亦斷不能於奉省年例協款外另增巨項只
可就該省現有兵力認真整頓逐漸經營以自立不敗之地海參
崴一帶俄軍戢守甚嚴吉林兵力寡弱亦未能出境妄圖致啟邊

朝鮮所稱朝鮮兵單餉賤與其糜巨帑以餌強鄰何如分犒資而
拯屬國所費甚微所益甚大等語朝鮮雖甚貧弱向無乞糴上國
之事將來設有意外警變則我分兵援助前明及
國初曾有行之者屆時量力度勢妥辦似無所謂分犒資而拯屬
國也所有酌撥籌議各節附片密陳伏乞

聖鑒謹
奏

裁撤張家口糧臺摺

光緒六年十二月十一日

奏爲裁撤張家口糧臺改給烏庫防兵月餉令其自行糴食以節經費恭摺仰祈

聖鑒事竊查同治九年奉

旨於張家口設立糧臺辦運烏里雅蘇臺庫倫等處防兵口糧由戶部按年撥給餉銀派口北道督同委員經理原因口外臺站不齊各路調防兵丁較多難於糴食是以由口辦運近年陸續撤遣統計在防不足千人而該糧臺開報米價運腳均較原辦時加增雖市值未能強同經手人員究不無含混卽如辦運烏城軍米光緒四年每石合價腳銀十一兩零五年每石合價腳銀十兩零其糧臺員役薪工房租雜項尙不在內殊屬糜費且因俄商爭運茶箱車駝多被雇夫往往軍糧稽壓或致中途霉變貽誤後期必須

斟酌變通以期嚴實正飭查議開通准戶部來咨亦以糧糴辦
運軍糧於兵食未有利濟部餉難免虛糜現在口外臺站均已添
設兵丁領餉糴食不致爲難奏請由臣察度情形改給該軍月餉
等因臣查張家口糧臺前係新任口北道奎斌創辦諸務尙能認
眞當飭該道會同前口北道王珩察核妥議加餉章程即可裁撤
糧臺旋據該道等稟稱烏城向在歸化城古城等處買糧運路較
張家口爲近現存防兵僅五百餘名每年僅需粟米一千六百餘
石若每石折給米價運腳銀六兩每名月合銀一兩四錢九分四
釐可就近自行糴食其駐防庫倫之宣化練軍三百餘名亦卽照
辦等情臣查烏城既可就近購運軍糧自應查照部議改給月餉
令其自行糴食惟該兵遠戍邊荒須優給折價以示格外體恤若
每石合銀六兩或恐不敷因議每石米價運腳折給銀八兩每兵

每月例領粟米二斗四升九合應折米價運腳銀一兩九錢九分
二釐計現存官兵五百五十二員名前經察哈爾都統奏明無論
大小建每月運整數米一百三十六石每年十二箇月合米一千
六百三十二石其應折價銀一萬三千五十六兩閏年十三箇月
合米一千七百六十八石其應折價銀一萬四千一百四十四兩
至駐庫宣化練軍兵夫每名每月應需米三斗向由保定練餉局
於該兵夫應得底餉內扣出米價解交糧臺辦運由糧臺另支運
腳每石需銀七兩左右今議每兵夫每月折給銀一兩五錢以爲
自行辦運米糧之費其底餉內原扣米價卽無庸再扣計三百四
十三名每月應折給銀五百十四兩五錢每年十二箇月其應折
銀六千一百七十四兩閏年十三箇月其應折銀六千六百八十
八兩五錢其小建仍照章核扣查張家口糧臺每年請領部餉銀

四萬四千六百兩內有添練宣軍馬隊加餉銀三千六百兩由該糧臺撥歸練餉局支放其餘四萬一千兩作為烏城防兵米價運腳駐庫宣軍運米腳價餘賸無幾今變通辦理每年應由部撥給烏城防兵改折米價運腳銀一萬三千五十六兩駐庫宣軍改折辦運米糧及原有添練馬隊加餉銀九千七百七十四兩閏年應由部撥給烏城防兵改折米價運腳銀一萬四千一百四十四兩駐庫宣軍辦運米糧及原有添練馬隊加餉銀一萬二百八十八兩五錢統計每年只須銀二萬三四千兩較從前歲可省銀一萬數千兩實於部庫撙節不少惟此係防兵計口授食要需未能稍有緩欠應請

旨敕下戶部按一年一次預行撥給俾得領回及時自行采辦所有烏城軍火現由糧臺運至來年六月底止應自光緒七年七月

起由部撥給折價銀兩卽交該處領餉委員搭解回烏散放其駐庫宣軍米石已由糧臺運至本年十二月底止應自光緒七年正月
月起山部撥給折價及原有添練馬隊加餉銀兩卽歸練餉局委
員於頭年冬季領回分別轉解散放查該糧臺上屆報銷餘銀及
今年請領部餉除用過外約計尙存銀二萬餘兩臣已飭奎斌查
明確數月行專案報部卽抵作光緒七八年駐庫宣軍辦糧折價
及原有添練馬隊加餉以免領解之煩現在各路軍糧均已運出
卽飭將糧臺於十一月裁撤至此次變通章程臣於九月十月十
一月三次飛咨烏里雅蘇臺將軍今尙未據咨覆未便再任延宕
且烏城防兵現議每兵每月折給銀一兩九錢九分二釐較之駐
庫宣軍每月領項一兩五錢及口北道原擬折給銀一兩四錢九
分四釐可多得銀四錢有奇實已格外加優更較宣化派赴烏科

各城換防官兵餉數倍厚必可敷用應請

旨敕下該將軍卽行照辦以節部款除分飭遵照外理合恭摺由
驛具陳伏乞

皇太后

皇上聖鑒訓示謹

奏

籌辦察哈爾防餉摺

光緒六年十二月十一日

奏爲直隸察哈爾防軍需餉孔亟請將現辦口外廠地押荒租項分撥濟用恭摺仰祈

聖鑒事竊臣鴻章前奉本年二月二十六日

寄諭直隸張獨多三廳各旗官荒馬廠開墾已有成效若能認真查明責令按畝補交押荒銀兩比戶計田派夫訓練餉需既有著落練勇卽可有裨尤爲兩得之計著李鴻章遴員切實查明應如何籌辦之處由該督酌覈具奏等因欽此遵卽奏派口北道奎斌督同印委各員認真查辦先就惠鑑報墾地畝酌擬章程十一條於五月間具奏聲明此外各旗官荒馬廠擬仿照辦理其各地押荒租項究有若干俟查明留充防餉分撥濟用等因奉

旨戶部知道欽遵在案旋准戶部咨稱押荒租項擬令解部惟體

察防餉艱窘情形實有不得不留之勢查張家口一帶爲京北門戶疊奉

諭旨先事籌防臣祥亨前於察哈爾八旗挑出官兵五千名原擬分路駐紮一體訓練祇以籌餉艱難僅能動支茶馬釐捐餘款先練千名實屬不敷分市其墾地者皆係外來農民秋成各自歸里閒有散居附近不成村落勢難比戶出夫應於原挑八旗官兵尙未訓練之四千名中再行酌量添練所需餉項並無別款可籌專指押荒銀兩應急臣鴻章前飭宣化練軍馬隊四營就近巡防北路並添調淮軍馬隊兩營扼紮宣郡聯絡聲援核計需餉甚巨近年各省關奉部指撥協款日增額解練餉淮餉愈形短絀局庫乏點金之術軍士有枵腹之虞亦指押荒銀兩接濟至原設天津海防練軍尤關重要向賴津海東海兩關洋稅爲的餉乃近年稅收

頓減又有部撥外協之款遂更入不抵出往往懸釜待炊每值正
河封凍之時稅無可收餉源益竭必須就地籌畫貼補應請將口
外三廳各旗廠地每年所收租項撥充天津海防練軍月餉惟每
頃每年只合租銀一兩零爲數有限且地須次第勘丈然後計畝
升科其升科年分亦有先後之別將來若遇水旱荒災又應照例
豁緩非若押荒銀兩地戶每畝應交一二錢可現成必得者應俟
勘丈清楚實計自某年起應徵租銀若干再由臣鴻章奏明立案
至押荒一項按現在已經勘丈地戶應交之數約銀三萬兩已飭
迅速催交連續收銀兩應請一併撥充察哈爾添練官兵及宣化
邊防淮練各軍餉項各半分用臣詳奉旨當妥酌就款添練籌節
動支以免後繼爲難臣鴻章並飭局核實奏放將收支數目彙冊
報部伏念時事多艱籌防孔亟直察情形又皆奇窘實不得不以

就地籌出之餉留贍本境防軍免致月請部款且係欽遵餉需有

著練勇有裨之

寄諭而行仰懇

特恩俯准照辦以裨大局臣等往返函商意見相同謹合詞恭摺

由驛陳請伏乞

皇太后

皇上聖鑒訓示謹

李文忠公奏稿卷三十九